

N vare inant tl plurilinguism

En venerdì dan otedé el gnü stlüt jö l'ann de scora y scolina, mo incé n maiù proiet plurilingual. A San Martin de Tor el gnü presenté unitès didatiches por l'insegnamënt di lingac tles scolines

Didatica - La realtà ti paisc ladins se damana la conescënza de de plü lingac. Le sistem scolastich ladin respogn a chësc bojëgn meton man bele tla scolina da laurè te trëi lingac. Por che i mëndri ne vëgnes nia suraciarià, laòron bele da set agn cun n sistem che fej ordinn, rapresentan vigni lingaz cun n ater corù: cöce por le todësch, ghel por le talian y vërt por le ladin. La scolina à tres indò fat vari inant te chësc insegnamënt plurilingual. De un n vers à les maestres instësse laurè fora material de insegnamënt, aladò dl ordinn linguistich di trëi corusc. A livel scientific el inrescides neurolinguistiches che testimoniëia che le ciurvel laora te na maniera integrada, y che da imparè lingac s'anüzel de competënzes linguistiches che an à bele.

"Le sistem scolastich cun de plü lingac é tres plü conesciù fora dles valades ladines, y tröpes families de Südtirol oress incé l'avëi", à dit l'assessur Florian Mussner pro la



Pro la presentaziun di material: dmc Roland Verra, Hannelore Insam, Theodor Riffeser, Edith Ploner, Rico Cathomas y Florian Mussner.

presentaziun dl material. Mo deache nosta situaziun de mendranza é tan particolare, ne pöl por l'insegnamënt nia gnü copiè material de d'atri posc. Les colaboradësses dla scolina s'à te chësc cajo dè dassënn da fà y le resultat é n proiet de cualité: "Le sistem scolastich cun plü lingac é stè n suzes, al sarà tres n majer suzes y al fajarà storia", à dit inant Mussner, sciöche rapresentant ladin tla Junta Provinciale.

Les unitès didatiches nöies à dui punc zentral: ares é fates a na moda da anuzè les conescënzes linguistiches che i pici à bele, y cun le sistem di trëi corusc vëgnel fat ordinn, a na moda che i pici pois svilupé na strotöra.

"La metodologia visuala dëida tò sö plü sauri les parores nöies y les laurè sö", à dit le professor universitar Rico Cathomas.

Les maestres dla scolina à cun la suravijiun scientifica

dl professor Cathomas laurè fora unitès didatiches por podëi laurè dami y plü sauri cun la metodologia dla didatica linguistica integrada. Le Sorvisc Provincial de Inovaziun y Consulënza por les scores ladines à laurè para por dè fora na mapa cun 30 unitès didatiches, che trata te trëi lingac argomënc sciöche natöra, tiers, savëi dl corp, spëisa, corusc y stories.

La gran cualité dla mapa de laur é aladò dl intendënt Roland Verra gnüda a s'l dè ajache ara é gnüda laurada fora te n dialogh, fajon tröpes proes pratiche y cun n gran barat de feedback. Surapro el material laurà fora da chi che laora dè por dè cun i mëndri.

Chësc vare de cualité por l'insegnamënt tles scolines ladines é gnü a s'l dè tres la colaboraziun dla scolina cun l'université y le Sorvisc de Inovaziun y Consulënza. "Sce les scolines ladines é bunes da tignì chësc livel alt, el incé por mirit di mesums y dles störes che é tres indò gnüdes metüdes da jì tres l'assessur ladin", à alzè fora l'ispeturia Edith Ploner pro la presentaziun tl Istitut Ladin a San Martin. (as - ofize stampa provincial)



Material didatich metü fora.